


Kontzientzi eragozpena, intsumisioa eta antimilitarismoa

Hernaniko KEM - MOC



*Indarkeriaren ahulezia.
Kontzientzia arma
guztiak baino
indartsuagoak.*

“Kontzientz Eragozpena,” “Intsumisioa”, “Antimilitarismoa” azken urteetan ezagunak egin zaizkigun hitzak dira. Hitz horiekin Soldaduskaren aurkako jarrera azaldu nahi da, baina ez hori bakarrik, Militarismoaren aurkako eta gizarte justu eta solidariago baten aldeko jarrera eta konpromezu ausart nahiz koherentea ere adierazi nahi dira. Kontzientzi Eragozpenak (intsumisioa barne) badu pentsamolde eta esanahi berritzaile eta hobetzaile bat. Sar gaitezen orain gai guzti hau aztertzen.

HISTORIA PISKA BAT

Aspaldidanik, eta legeen arabera, Soldaduska derrigorrezko egin behar bat izan dugu: baina beti izan dira, Soldaduskaren deia baztertu eta joan izan ez diren gazteak.

Hauexek genituen edo ditugu KONTZIENTZI ERAGOZLEAK.

Francisco Franco zenaren garaian ere izan ziren Kontzientzi Eragozleak, eta garai hartako erregimena kontutan harturik (dik-tadura), oso gogor tratatuak izan ziren eta 2 eta 3 urte kartzelan pasa behar izan zituzten. Franco hil ondoren (1975) kontzientzi eragozle edo objetore gartzelatuak amnistiatuak izan ziren eta Gobernu berria Kontzientzi Eragozpena erregulatuko zuen Legea (K.E.L.) prestatzen hasi zen.

Garai hartan (1977) sortu zen Kontzientzi Eragozpen Mugimendua (KEM-MOC), orduko kontzientzi eragozleak bilduz. Mugimendu honek Antimilitaristatzat hartzen du bere burua eta estrategia ez-biolent-

toa asumitzen du, Soldaduska eta Ejerzito guztien desagerpena duelarik helburu eta militaristak ez diren balore batzu (solidaritatea, elkartasuna, justizia,...) aldarrikatzen dituelarik.

Hala, 13 urte behar izan zituen Gubernu Espainiarrak legea (K.E.L.) ateratzeko, 1988-an hain zuzen, eta tarte haundi horretan (1975-tik 1988-ra) 22.000 objetore deklaratu ziren eta guztiek zai egoteko agindua jaso izan zuten. 1988 urtean sorturiko Kontzientzi Eragozpen Legeak ondoko ondorioak ekarri zituen:

1.-Ordurarte egindako objetore guztiak (22.000 gazte) amnistiatuak izan ziren. Hernanin ere badaude zenbait objetore amnistiatu.

2.-Soldaduska egin nahi ez, Kontzientzi Eragozle bihurtzen zen gaztea derrigorrez 18 hilabetetako Ordezko Zerbitzu Sozial bat egin beharrean gelditzen zen (Soldaduskak 12 hilabete iraupena izanik). Gaur egun Soldaduskak 9 hilabete ditu eta ordezko Zerbitzu Sozialak 13.

3.-Norbaitek kontzientzi eragozle bihurtzeko arrazoi konkretu batzu (etikak,...) eman beharrean gelditzen zen eta Soldadutza hasiz gero ezin zen objetore bihurtu.

Lege honen aurrean Kontzientzi Eragozpen Mugimenduak (KEM-MOC) bere ezadostasuna azaltzen du eta INTSUMISIO-AREN estrategia bultzatzea erabakitzen du. Estrategi hau beste elkarte garrantzitsu batzuk ere (KAKITZAT,...) bultzatzen dute. Modu honetan jaiotzen da INTSUMISIOA 1989. urtean.

ZENBAIT ARGITASUN

Historia piska bat utzi, eta gaur egungo egoerara etorri, gaur eta hemen, gazte batek, Soldaduskara ez joatekotan, 2 aukera ditu:

1.-Kontzientzi Eragozle Intsumiso bihurtzea. Modu horretan ez du onartzen ez Soldadutza, ezta ere 1988. urteko Kontzientzi Eragozpen Legea. Beraz, bere ezezkoa ematen dio bai Soldaduskari eta bai Ordezko Zerbitzu Sozialari.

2.-Kontzientzi Eragozle Legal bihurtzea, legea onartuz eta Soldadutza ordezko 13 hilabetetako Ordezko Zerbitzu Soziala onartuz. Hala ere, gaur egun, gazte asko, Ordezko Zerbitzura deituak direnean ez dira joaten eta horrela objetore legala izatetik intsumiso izatera pasatzen dira.

Gazte eta pertsona guztiek bere kontzientziari begiratzuz aukera egin beharko dute. Gure ustetan, Intsumisioa jarrerarik garbiena eta ausartena bezala nabarmentzen da, Soldadutza muinera dihoalako, Soldadutza kendu behar dela garbi azaltzen duelako.

Eztabaida honetan galdera asko sortzen dira eta horietako bat hau da: **Zergatik intsumisoek ez dute onartzen Zerbitzu Sozial bat Soldadutza ordez?** Hiru dira galdera honen erantzunak:

1.-Intsumisoek ezin dute onartu Ordezko Zerbitzu Soziala (O.Z.S.) zeren zerbitzu hori onartzeak Soldadutza Legitimizatzea dakar. Beraz, O.Z.S.-ak Soldadutza mantentzea du helburu, eta Soldadutza gaizki dagoenez, bere ordezkoa ere gaizki dago. Gainera, O.Z.S.-ren bidez Militarismoaren aurka dagoen kritika guztia estali eta isilduarazi egiten da.

2.-Ordezko Zerbitzu Soziala Soldadutza baino 4 hilabete luzeagoa (Soldaduska 9 hilabete eta O.Z.S. 13). Hau bera ere Objetoreenganako diskriminazio bat da.

3.-Ordezko Zerbitzu Sozialak lanpostu asko kentzen ditu eta horrela ulertu dute sindikatu anitzek.

Ordezko Zerbitzu Sozialak oztupo ugari aurkitu ditu martxan jartzeko, zeren entitate askok eta askok (Diputazioak, Karitas,...) bere ezezkoa eman bait diote zerbitzu honi eta oso postu gutxi daude zerbitzua betetzeko. Gaur egun, 180.000 objetore legal daude Estatuan eta O.Z.S. egiteko lekuak gutxi dira (20.000). Bestalde, Eusko Jaurlaritzak eta Udaletxe askok Kontzientzi Eragozle Intsumisioen aldeko eta 1988. urteko Legearen aurkako mozioak onartu dituzte.




Intsumisioaren bidez ejerzitorik gabeko etorkizunerantz.

ZENBAIT DATU


1988. urtez geroztik etengabe egin du gora Kontzientzi Eragozpenak. Bai objetore intsumisoak eta bai objetore legalak asko ugaritu zaizkigu eta Hernanin ere eragin handia izan du. Gaur egun, esan dezakegu 9.400 intsumiso daudela estatu osoan, horietarik 3.282 daude Euskal Herrian. Ikus ondoko grafikoa. (1994-ko urtarrila arteko datuak dira).

INTSUMISO KOPURUA BAI SOLDADUTZARI ETA BAI BERE ORDEZKO ZERBITZU SOZIALARI.




Bestalde, esan dezakegu Estatu mailan 3 gaztetarik bat (% 30) objetore legal bihurtzen dela eta Euskal Herrian, berriz, erdiak (% 50) izatera iristen da. Ikus ondorengo grafikoak. (1994-ko urtarrila arteko datuak).

**KONTZIENTZI ERAGOZPEN LEGALA %-etan KONTINJENTE
MILITARRAREKIN ALDERATUZ, ETA LURRALDEZ-LURRALDE**




**KONTZIENTZI ERAGOZPEN LEGALA %-etan KONTINJENTE
MILITARRAREKIN ALDERATUZ eta EUSKAL HERRIAN**



Gure ustetan objetore legalen igoeraren zergatia hein haundi batetan Intsumisioagatik izan da. Intsumisioak eztabaida haundia sortu du Soldadutzari buruz eta ondorioz lehen baino gazte gehiago egin dira Objetore. Gainera, objetore hauek O.Z.S. egitera deituak direnean, asko eta asko ez dira joaten zerbitzu horretara, horrela intsumiso bihurtzen direlarik.

URTEZ-URTE KONTZIENTZI ERAGOZPENA %-ETAN KONTINJENTE MILITARRAREKIN ALDERATUZ ETA ESTATUAN.



HERNANI MAILAN

Lehen aipatu datuak Hernanin ere betetzen dira. Hernanin 1988. urtean amnisiatutako kontzientzi eragozle dexente azaltzen zaizkigu. Intsumisoak berriz, 1990. urtean azaltzen dira lehen intsumisoak Hernanin eta ondoren ikusten den gorakada izan du:

HERNANIN INTSUMISO KOPURA

1990. urtean	5 intsumiso
1991. urtean	16 intsumiso
1992. urtean	22 intsumiso
1993. urtean	36 intsumiso
1994. urtean	15 intsumiso (martxoa arte).
guztira	94 intsumiso

Objetore legalen kopurua Euskal Herrikoarena bera da Hernanin ere, hau da, bi gaztatarik bat (%50) objetore legal bihurtzen da.

1990. urtean eta orduko intsumiso eta objetoreen elkarre bezala Hernaniko Mugimendu Antimilitarista KEM-MOC sortzen da. Momentu horretatik aurrera hasten da intsumisioa, kontzientzi eragozpena eta antimilitarismoa Hernani mailan zabaltzen.

Talde honen eskutik, Soldaduska ez ezik, Ejerzitoak eta balore militarista guztiak gainditzeko ahalegin eta ekimen ugari antolatzen dira, eta adibide gisa:

- Aste Antimilitaristak antolatzen dira, Nazioarteko Kontzientzi Eragozpenaren eguna (Maiatzaren 15) ardatz moduan hartuta.

- Biteri Kultur Etxeko Liburutegia Intsumisioari, Antimilitarismoari, Bakearen Aldeko Heziketa eta ez-biolentziari buruzko liburuz hornitzen da.

- Bakearen Aldeko Ikastaroak antolatzen dira, gizarte justu eta hobeago baten oinarriak landu nahian.

- Mozioak aurkezten dira Hernaniko Udaletxean, gehiengoaren onespenezkin onartuak izan direnak.

- Ikastetxeetan, Molotoff Irratian eta hainbat lekutan informatzeko saioak egiten dira. Manifestapenak burutzen dira,... eta abar.

Bere garrantzia ere badu Hernani mailan 1990. urtean sortu eta oraino jarraitzen duen gune informatiboak: "Objezioaz eta Intsumisioaz Udal Informazio Bulegoa" ostiralero dagoena 6-etatik 8-etara Biteri Kultur Etxean. Azkenik, 1993-ko urrian Hernani

Intsumisioa sortzen da, intsumisioaren alde eta epaiketen aurkako talde zabal bezala.

EPAIKETAK ETA KARTZELA-ZIGORRAK

Eusko Jaurlaritza, Alderdi Politiko anitz (EAJ, HB, EA, EuE, Zutik, IU,...) eta udaletxe asko eta asko (Hernanikoa tartean) Intsumisioaren alde eta 1988. urteko Kontzientzi Eragozpen Legearen aurka azaldu dira, baina Gobernuak ez du horrela ulertu eta intsumisoak gartzelaratzeko bidea hartu du. Intsumisoak Soldadutzara ez joateagatik 2 urte, 4 hilabete eta egun bateko gartzela-zigorra jasotzen du (Legearen arabera), eta horren ondorioz, intsumiso asko gartzelaratuak izan dira.

Hemen esan behar da epaile asko intsumisioen alde jarri dela eta horrela intsumisioen epaiketetan denetariko jendea izan dugu: zenbait epailek libre utzi ditu intsumisoak, beste batzuek 3 eta 4 hilabetetako gartzela-zigorrak ematea erabaki dute (kartzelara ez da joan beharrik hain kondena txikiekin); baina kasu askotan kondena luzeak izan dira (2 urte, 4 hilabete) eta intsumisoak gartzelara joan beharrean aurkitu dira.

Beraien etorkizuna jokoan egon daiteke.



Nafarroan badaude gaur egun 120 intsumiso preso eta Estatu osoan 160 kontzientzi preso badaude.

Bitxia da Nafarroako egoera. Beste lurralde guztietan intsumisoen prozesuak geldirik zeuden arren (epaileek duda asko zeuzkaten) Iruñeko epaileak, 1992.urtean, intsumisoei epaiketak egin eta kartzela-zigorak ezartzen hasi ziren. Honen ondorioz, beste inon baino lehenago, intsumiso preso asko azaltzen zaizkigu Iruñeko kartzelan. Egun, lurralde guztietan epaiketak egiten ari dira eta modu honetan lurralde gehienetan kontzientzi presoak badauzkagu.

Gipuzkoari begiratu ezker, 1993-ko azaroan hasi ziren normalki epaiketak egiten. 1993-ko azaroaren 15-ean bi hernaniar izan genituen epaituak, Hernaniko lehendabizikoak, eta 18 hilabetetako kondena jaso zuten. 1994. urtean zehar hernaniar asko izango dira epaituak, eta ondorioz, Martuteneko kartzelara joan beharrean.

Gure ustetan, bide horretatik ez da bukatuko arazo hau. Soldadutza kentzearekin baino ez da amaituko arazo hau. Ikusiko da aurrerantzean zer gertatzen den. Denok izango gara ikusle eta protagonista aldi berean, Gizarte guztia baitago gatazka honen biran.

MUNDU HOBEAGO BATEN ALDE

Kontzientzi Eragozle Intsumisoak gero baino garbiago ikusten dute Intsumisioaren bidez, Mundu hobeago baten alde lanean ari direla. Gartzela-zigorra jaso eta gartzelara joateak zentzu handiago bat ematen dio Intsumisioari. Soldaduska gaizki dagoela aldarrikatzen da, balore militaristak (hierarkia, obeditu beharra, indarkeria,...) gaizki daudela oihukatzen da, gastu militarrek gaizki daudela salatzen da, eta gizarte solidariago, justuago, baketsuago baten aldeko apostu leiala egiten da. ■



Gizarte hobeago baten aintzindari.

